

小峴山人詩文集

小峴山人續文集補編

無錫秦 瀛凌滄

論學

余不知學而絕無取乎論學者之主門戶也宗朱者黜  
陸宗陸者又黜朱夫朱子之學居敬窮理踐履篤實萬  
世無雙卽陸子亦自有與朱子相契處未可概沒然自  
有朱陸異同之說論學者紛如聚訟其間有不能不辨  
者姚江事業彪炳其文章亦卓然可傳特以講學提唱  
良知遂叢謗議孟子曰人之所不學而知者良知也人  
之所不學而能者良能也姚江有見於時俗溺於功利

失其本心獨揭良知二字以解格物致知之義良知曰致良能亦曰致可乎此正與集注窮至事物之理語相肯林次崖曰姚江所謂良知卽釋氏所謂本覺及性覺妙覺也所謂障礙卽釋氏所謂煩惱智法諸障衆生有妄自蔽妙明也所謂勝私復理則其知自在卽釋氏之諸妄一切圓滅獨妙真覺離垢消沈法眼清淨成妙羅漢也所謂格其心之不正以歸於正卽釋氏之去妄說爲真識也次崖之言如是然跡姚江生平始謫龍塲終避廬山辛若患難其中自有得力處非僅空談性命者可比沿習旣久流入狂禪未可盡歸獄於姚江也有明

之季運邁陽九滄海橫流劉蕡山黃石齋兩先生見危授命殺身成仁一以畫江之役絕粒死一以起兵赴難死兩先生之學皆主姚江石齋且曰朱子學孔而不似孔陽明學孟而真似孟言誠失當而兩先生平日忠義激發其告思宗必舉大學慎好惡中庸慎獨之旨聖賢心傳昭然若揭世或傳石齋歸心丹訣臨難時如顏平原之尸解此則近於誕妄竊鄭公丹訣一匣邵子取而焚之是可以知邵子矣

處士饒宇路君家傳

余曩在京師路子同辰乞余爲其先府君饒字作家傳  
余未之應也旣歸請益力乃據同辰兄弟所述君梗槩  
爲文以塞其請同辰與兄同申敦於學其言不誣君姓  
路氏名復然字俎引饒字其號其先自汶上遷宜興萬  
歷中八世祖雲龍以進士歷官江西布政使參議路氏  
始顯於時父撰乾隆庚午舉人令肥城縣知縣自高曾  
以來家世單弱母樗孺人禱於嶽神而生君束髮就塾  
肥城君課之嚴稍長發憤力學爲前輩所器年二十八  
補博士弟子員遭母喪哀毀骨立瀕於危者數四乾隆

癸卯甲辰間省肥城君於肥城無何肥城君謝事歸居縣城之撒珠巷而先世故有廬在潼渚頗擅園池竹木之勝稍傾敗矣肥城君命重治之常往來焉旣而肥城君歿於撒珠巷君遽挈婦子空城宅而居潼渚將有終焉之志而君歿矣君生平深研經籍凡六經傳記皆博採先儒詁義而窺其堂奧於春秋胡氏傳學尤精嘗綴其語爲駢語十八篇二萬餘言名胡傳提要熟復宋五子書期於躬行心得事親以誠友愛其弟終身無閒言性坦率往往面折人過人以君無他腸多諒之居潼渚數年其民向嗜博簫肆爲奸欺者摩撫遷革率化而爲

善烏虜君如是是亦足以傳矣娶史氏有賢行子四人  
歲貢生同申舉人同辰余皆識之於同辰尤習君之歿  
也年甫六十其女夫鳳臺縣知縣前翰林院庶吉士武  
進李兆洛銘其墓

論曰余聞路君倜儻好施與急人之難雖空乏靡倦脫  
見用於世當必有所施而惜其僅以諸生終慨自世教  
旣衰習俗多以浮華相尚或矯之惟務鄙嗇兩者雖殊  
均無以善其後君處幽居下而其爲學之勤與所以律  
已者均近於古余未識君而習於君之子恂恂然有儒  
者之行夫亦可以知君矣

○王淑姑傳

浙東向多奇人偉士遭屯蒙難尤以節烈著見於前人之文者多矣以余所聞王氏女貞烈事蓋又女子中之奇人云女名淑姑臨海人父昌熙幼慧從同縣洪節婦讀書於素輝閣稍長能爲詩會江寧李莊爲象山都司與昌熙善莊有仲子曰文煒昌熙以女字之無何莊之弟權自江寧以書來則已爲文煒聘同里吉氏女矣於是不得已爲兩娶之議女故長於吉擬以齒序而爲姊妹行僉曰可女雖不言而意亦從惟女之母以爲不可乃還李氏聘物而少金約指二枚覓之不可得母將議



婚他氏女。涕泣不食。賦詩見志。書於其臥室之側。家人慮有變。密防之。女故解顏進飲食。伺其隙投井死。指上金環宛然。則夫家原聘物。蓋女矢志不字二姓。故藏之。而以爲殉也。時乾隆二十四年五月二十六日。年十九死之日。洪節婦來哭之。慟取其題壁詩。示諸戚黨。並歎異。以爲難。夫家聞之。曰。女之死。是欲爲吾家婦也。不可以不成其志。遂命其子詣臨海具禮迎女。木主及小像一幀。以歸。幀之上方有天台齊次風先生題辭。稱曰。貞烈吉氏女。亦賢。歲時祭祀。必懸女小像。呼之曰。姊云。閱五十八年。而鄞縣張友鐸乞余爲之傳。

或問

或有問於余曰。子見夫蝗乎。余曰。未見也。或曰。子但知蝗之爲蝗。而不知似蝗非蝗者之爲蝗也。夫蝗微物。么麼別名曰螽。厥種甚繁。蘊隆則達。鼓翅而飛。蔽雲乘風。所過原野。稊黍一空。人皆見之。以爲蝗也。驅而逐之。或捕之而食其肉。不數日而蝗盡矣。今有一物於此。軀長若虺。性毒於蠍。其聲如豹。其形如蛾。左右皆其爪牙。前後並其羽翼。睥其目。皤其腹。噓氣裂膚。張吻刺骨。吸百姓之膏。而瞰萬民之血。檣杌耶。饕餮耶。恣橫於此。歷有歲年。欲驅之而不能驅也。欲逐之而不能逐也。是物也。

日接子目何未之見也。余曰誠如子言。微獨子見之余亦見之矣。余與子無捕之之責。雖見之而莫可誰何。見如不見也。況有其責者方縱之。晏然於茲。而吾與子何能焉。余遊四方。所見似蝗非蝗而爲蝗者不少矣。子止見是物而乃以是爲病耶。或太息而去。作或問。

與人書

書來稱道某公似以爲眞道學僕竊疑之夫所謂道學者必先絕去夫功名利祿之見而後能致力於學有聞於道後世士大夫所知者功名耳利祿耳方成童入塾父師之所期於子弟與子弟所自期祇沾沾於利祿科第顯榮是當讀書之時而鄙夫患得患失之心胷早已畢具足下閉戶窮居無可表見若旣仕於朝且爲公卿則視其立朝居官之實跡而其人之根柢悉露某公敝衣糲食喜讀儒先之書矯飾名譽而其立身行己之大時不能自掩其私浮湛仕宦正與流俗之人無以異

本朝之初湯文正陸清獻學術不同並稱大儒稍近如

楊文定朱文端孫文定陳世倌蔡世遠兩文勤其學宗

法程朱皆有風節可紀士苟有志躬古之道當取前數

公生平梗概學焉而肖其為人非可高談性命而徒竊

其緒餘也僕少時嘗見桂林陳文恭撫吳頒近思錄於

學官文恭方嚴樸實其人不失前賢矩度然聞其幕中

有某者小人也揣知文恭至其室置高子遺書於几上

文恭輒頗悅之而某卽以是交通地方官爲關說文恭

用是少損知人之名寧化雷翠厓先生受學於方望溪

侍郎而爲朱文端陳蔡兩文勤所許其視學江左首謁

道南祠與諸生講學所著書指斥姚江不無太過而跡  
其生平建言以誠事母以孝在浙江劾巡撫周人驥謹  
災不報大節烺烺殆真不愧古人矣僕素不知學冒中  
空空一無所解惟功名利祿無稍介於其懷厯官中外  
於進退出處之際尙能自全晚節因來書一進其說非  
敢好議論而厚責人也不宜

萬壽無疆詩序

皇上御極之二十有四年歲在己卯冬十月伏遇

六旬萬壽聖節撓申甫週諸福具備懽忻夷釋率土同  
慶先以上年

詔開鄉會試科並

下蠲免之詔後以元日

特頒綸綍祭告嶽瀆及先代帝王陵寢闕里孔林錫類  
尚齒旌善宥過汪濊龐鴻澤覃九有蓋我

國家至德深仁撫有函夏日所出入罔不率俾

列聖相承

重熙累洽

皇上續承丕基自

臨御以來蕩滌塵壒剪除非種

神機獨運詳播方畧巨浸欽氛大河順軌風雨協應神人胥悅

德教之所曼羨禮樂之所布濩渾淳沕滴旁細四塞然猶嚴恭寅畏夙夜不敢康屏珍玩杜浮靡念

祖德則謁

三陵

祈民福則



幸五臺

飭封疆以隆治化

勸農桑以厚風俗

祇祇亶亶丁寧告戒

臣

聞之易曰天行健君子以自疆

不息惟君子剛健中正有合於天行之健自疆不息以

日進於无疆故能首出庶物萬國咸寧詩曰維天之命

於穆不已又曰文王之德之純純亦不已不已卽至誠

之無息載見之章詩人致其頌美之辭曰思皇多祐俾

緝熙於純嘏卷阿之詩亦曰俾爾彌爾性純嘏爾常矣

惟能彌其性以符乎不已之德緝熙光明天亦予以純

報保佑申錫以成億萬年无疆之祿雅頌所載先後同  
揆臣濂顧蒙疎賤仰荷

皇上高厚生成疊被

知迺備位卿貳猥以耄年蒙

恩在告輟伏田里弗獲與在

廷賡拜之末不揣因陋恭撰

萬壽無疆詩三十首辭義弁鄙愧不足以頌揚

聖德於萬一瞻戀屏營謹拜手稽首以獻

○盧忠肅公集序

天之生君子將以有爲也。天旣生之。畀以大有爲之才。而適當需才之時。天必更生用君子之人。使之拯亂扶危。以盡其才。無所疑忌。摧沮而後能爲國家之用。社稷之福。朱子序李忠定奏議。謂天之愛人。不能不感於人事之變。氣數吉凶消長之故。使天下有治無亂。而必生弭亂之人。以爲之所。如明大司馬忠肅盧公。固天所生以弭亂之人也。前明末造。中原魚爛。公以一身樁拄其間。名震天下。而卒不免厄於楊嗣昌之手。畢命沙場。其遇視忠定尤爲不幸。此余讀公文集。不禁歎息痛恨於

媚嫉之臣妨賢病國而國祚亦隨之移也。公少知兵由進士起家、脩兵大名、卽著聲績、號天雄軍、進撫鄖陽、屢挫張獻忠、斬獲數千級、楚人恃爲長城、而總理五省軍務之命下、時秦督洪承疇連喪大帥、賊渠李自成、勢日張、楚督陳奇瑜又有車廂峽之敗、公受事、軍令一變、所至輒有功、無何京師戒嚴、詔公以勤王之師入衛、公至誓師畿輔、親冒矢石、連晝夜大小數十戰、而思宗已入嗣昌言、奪公尙書郎、餉盡援絕、遂及賈莊之難、其死也、身被四矢三刃、血流遍體、時崇禎十二年十二月十一日也、年三十有九、公爲人深沉有大畧、卽之溫然儒者、

所爲文章多見於奏議。剴切洞達。深中事理。忠肝烈腸。足以貫日月。薄風雷。而無以格奸回之志。動人主之聽。蓋氣數旣窮。雖天生有爲之才如公者。亦付之無可奈何。而所以致之者。媚嫉之臣也。方公勤王時。先聞父訃。麻衣衰經。疏請奔喪。而嗣昌方奪情。緋袍入政府。公規之不聽。反銜公。及召對平臺。面陳戰禦之策。又積與嗣昌忤。必欲陷公於死。而後已。尙書終錄秦誓。特惡夫媚嫉之臣。而曰實不能容。以不能保我子孫黎民。嗣昌萬死不足惜。思宗以恭儉憂勤之主。內懷猜忌。外任小人。有孫高陽及公兩人而不能用。卒至神州陸沉。宗社傾。

覆詩曰人之云亡邦國殄瘁可不畏哉可不懼哉公旣死謗焰未息或謂公已遯越七十日始殮及乎時移代易公道大明而嗣昌之子猶作孤兒籲天錄爲嗣昌訟寃楚人猶多右之人心天理不將澌滅殆盡而無餘耶余讀公文集並志之以告後之論世知人者公集三卷見

欽定四庫全書總目集部提要云公凡六集其姪孫豪然彙刻另行今未之見豪然公弟象恒孫象恒鼎革後削髮行遯死公又有弟象晉殉節死公鄉後進任子泰購得豪然刻本參以盧氏家藏疏藁重加編次凡若干

卷集內獨缺崇禎十一年奏疏或以其時語涉忌諱早  
佚之無從錄入公初諡忠烈乾隆四十一年

特諡忠肅

二塘吟草序

陸野橋言朱涇張漁簪六華兄弟志尙高雅六華尤好爲詩旣而余過朱涇訪張氏兄弟新築園墅堂宇閒敞繞以修廊環以清谿榆柳映門海雲墮地余爲留連久之冒雨登舟而別閱月餘兩君遣倅來無錫乞余書額其廳事及他書舍忽忽者二年於茲矣今年夏六華郵其所爲二塘別墅吟稟屬余論次詩雖不多大都清遠恬曠如其爲人夫詩之爲道蓋難言之擬古或似其形非真古也恃才而失之驚非真才也若六華者乃可與言詩矣書此以還六華并示漁簪



尙義菴記

無錫西郭外舊有三義菴前楹祀漢壽亭侯中楹祀漢  
先主及侯與張桓侯左右則祀諸葛武侯龐德公而旁  
列姜維趙雲馬超黃忠四人像相傳創自先修敬公而  
箭源公炤重修之俗名三義菴守以僧徒歲久不葺廟  
幾壞余告於邑人某捐貲重葺屬從弟治董其事時嘉  
慶二十有一年也三義之說見三國演義其說近誣陳  
志但稱先主得關張二人夜則同寢誼若兄弟而兩人  
時侍立帝側終日不懈則君臣之分早定先主又得佐  
命之臣如武侯輩桓桓虎將角立爭雄以期掃蕩六合

義聲震於天下謂非漢壽亭侯及桓侯之力不及此或  
謂吾吳爲孫氏所有今祀先主於義不合余竊以爲不  
然先主始與孫氏合冀共圖操不謂孫氏背盟負約歸  
命國賊以致孫劉之好不終而漢壽亭侯且殞於呂蒙  
之手今侯廟祀徧海內通都大邑無不祀侯吾吳之人  
因之并祀先主蓋亦推侯翼戴之志以及於其主固春  
秋尊周之大義也其誰曰不宜余旣易菴名爲尚義而  
并闡侯廟所以崇祀先主之旨以泐於石

祧廟記

古有不祧之廟。卿大夫士於家廟外別建廟以祀其始祖。而始祖以降有功德者從而祔食。此所謂不祧之廟。卽不毀之廟也。若家廟側在寢門之外。以四親爲斷。蓋高祖而上服屬漸遠。五世親盡則祧。情無窮而義有止。宋人或主毀瘞之說。親盡則奉其主毀而埋之。竊謂木主者先人魂魄所依。祖宗雖遠而木主尙存。取而埋之心所不忍。卽義所未安。卿大夫士事亡如存。于五世親盡之後。奉先人木主而別建屋宇以藏之。此祧廟之所爲設也。吾秦氏向無祧廟。歷代木主歸大宗。年世久遠。

大宗又式微木主遂散失不可考惟九世祖文橋公及  
舜峯太清三世木主委棄敗屋中瀛知之屬子姓暫移  
奉于文恭公家祠會自京師告歸族祖晉陞來告晉陞  
世居第六箭河之濟美堂堂後有樓故淮海祠後淮海  
樓之遺址也淮海樓廢而入於濟美堂今樓又圯晉陞  
願以其址歸淮海祠瀛廼與宗人議卽其址建祧廟又  
橋公于晉陞爲七世祖而於瀛爲九世同出自舜峯公  
廟成而晉陞沒瀛旣偕宗人自文恭公祠移奉三世木  
主於祧廟而公蕃公亦例當祧并移奉焉奉移之日設  
音樂陳酒醴子姓咸集踞而獻爵合食一堂啓櫝以祭

每歲以仲冬月朔舉行祫祭之禮亦如之兩旁爲夾室  
族人之無後者舉木主而附藏之遇祭則附食以別於  
厲壇之鬼且夫先人之服屬既遠則子姓之分誼日疏  
平居賀召不相及死喪不相聞同祖之戚等於路人惟  
有祧廟則必祭祭則子孫必聚昭穆之次尊卑長幼之  
序雖疎也而寓親親之義焉是役也從弟治實董其成  
工旣竣且言曰是不可以無記爰徇其請記此以泐諸  
石

古倪園後記

古倪園在松江郡治北郭外園傳爲倪氏遺跡沈古心翁葺而治之者也長洲王惕甫記稱華亭倪氏世譜載雲林先生兄方菴自無錫徙上海其七世孫邦彥遷郡城始築是園閱三四世鬻諸他氏古心翁從他氏構得之規模增廓具有邱壑之勝余考雲林從兄文光學道爲黃冠見無錫縣志而方菴無聞無錫倪氏家譜載雲林兄弟三人雲林居次長卽文光與志不合而其族並無所謂方菴徙上海者余以爲雲林當淮張時遯跡五湖三泖間避亂客松江最久多見於其詩意必當時嘗

居於是邦彥卽其地建置林亭人因名之曰古倪園若  
謂以邦彥得名邦彥係隆萬間人年代非遠不得向稱  
古倪園也華亭世譜以方菴爲雲林兄未知何據而惕  
甫於古倪園得名顛末亦或未之深考余嘗至是園幽  
靚窈深如展荆蠻民圖畫沈氏居之當世守勿失余作  
後記爲古倪園辨且以賀茲園之遭也

前兵部尚書閩浙總督達齋玉公神道碑

前兵部尚書閩浙總督達齋玉公以哈密參贊大臣告歸卒於平涼行館其孤斌良葬公於良鄉之某鄉某原閱數年麗牲之石缺如斌良持行狀丐余爲文以碑之公滿洲人姓瓜爾佳氏始祖諱某以功

封輔國公四世祖諱某駐防西安曾祖諱某祖諱某父諱某自曾祖以下並

封光祿大夫妣某氏生公兄弟五人公其季也先是公家遘家難自西安徙京師時公方八歲旣長偕諸兄同考授中書公在內閣諸城劉文正公深器之擢湖南衡



諸河檄所屬州縣疏濬下流水始退丁外艱旋爲刑部  
主事陞員外郎郎中遇事侃侃不阿文成阿公益重公  
擢湖南岳常澧道移山東濟東泰武臨道忤巡撫國泰  
被劾鬁級補刑部員外郎擢山東按察使遷安徽布政  
使陞刑部侍郎兼廂黃旗滿洲副都統正白旗鑲藍旗  
漢軍副都統兼管左右兩翼署 經筵講官

賞戴花翎授山東巡撫調浙江巡撫杭城多火患公至  
爲文禱於吳山之火神廟患潛息海塘自范公塘至海  
寧之尖山綿亘二百里會秋汛潮水衝突刷護沙直逼

塘危甚余方官海防道公與余日督塘工設法治之塘  
得全時洋盜充斥水師廢弛久公親駐寧台台洋之大  
陳山久爲盜藪公奏請封禁製礮位號西瓜礮趨促舟  
師出洋勦捕遇盜卽擊多所斬獲商舶畏盜多停泊口  
岸公撥兵船衛送以行比鞠盜分別治罪而釋難民人  
以是稱公平恕嘉慶四年冬加兵部尙書陞閩浙總督  
閩山海錯雜風俗不醇天地會匪及械鬥之案蜂擁蟻  
集公悉心措置動中機會而閩海毗連粵東外洋盜匪  
往來出沒尤衆而蔡牽爲巨魁蔡牽漳人也糾結血黨  
有盜艘二三百隻嘯聚島嶼積爲海患公設戒備防口

岸信賞必罰將士用命至是

上特詔浙江水師提督李長庚督兵赴閩捕蔡牽李先官定海總兵公嘗密薦李

上以是知李李莅閩公與商榷事宜頗相中會李將出洋乞戰船於公公以脩造未蒔事稍遲之續別有陳奏李聞而疑公以逗遛劾已遽以不發戰船劾公被逮下刑部獄公對簿自陳遣戍烏魯木齊逾年

上命公爲哈密參贊大臣公尋以目疾請解職旣入關而道卒時嘉慶某年某月某日年六十有七公好談經濟負氣不肯下人勇於任事自監司以下皆敬憚公遇

鎮將尤威重而怨公者遂生謗黷始至浙頗不悅余既  
卽豁然又屢忝忝權按察使事有所請靡不允嘗謂臬  
使陸君伯煥曰子治刑名當師某又常語人吾在浙幸  
不失秦君公性至孝幼育於外氏以應得

封典馳贈外王父母胞兄制府公罷官後負罰鍰累萬  
公請代償親申中有急難必力援之娶某氏某女繼某  
氏某女俱

封一品夫人子六人長俊良早殤次斌良官蘇松常鎮  
糧儲道次某某女適某孫某某公以幹濟大才敷歷中  
外而功名不終其獲譴本末人多不及知斌良示余公

前發奏稿始知公之宛余故備書之以揭於公之肝

○雲南巡撫四川布政使石農李公神道碑

嘉慶二十有二年秋九月

天子擇四川布政使李公石農爲雲南巡撫時公方以布政使樞四川總督事未聞

朝命而卒越三月其孤謹度聞訃跣足至成都御公匱以歸今年夏遣其僕金義持行狀乞余文其麗牲之石余與公久故知公深不可辭公諱鑾宣字伯宣號石農靜樂人其先世世系官闕具余所爲青上府君墓表府君者公之考也公由拔貢生以乾隆己亥舉於鄉庚戌成進士授刑部主事陞員外郎郎中充秋審處總辦時

治刑尚峻刻公性仁恕務持平多所平反嘗分校會試  
稱得人京察一等擢浙江溫處兵備道溫濱海海多  
盜公行保甲嚴戒偷竊盜悉當其罪而釋難民庚申浙  
東大水連數郡處尤劇卹莊廬舍一空水至城下城幾  
壞公馳至立發帑賑卹理荒政收遺骸而活災黎數千  
人凡在溫處六年以最陞雲南按察使巡撫某僉人也  
公抗直素不悅公所爲會有建水龍世恩之獄世恩飲  
於其隣向廷貴家世恩從兄龍恩顯與世恩弟某故不  
協走告世恩語侵廷貴廷貴忿伺龍恩顯之歸候之隘  
巷而刺之遽斃世恩不知也聞於官坐世恩罪上諸司

世恩極口呼冤檄廷貴至竟吐實獄具釋世恩而以其狀申巡撫巡撫覆訊仍如縣讞而以草率定案劾公並請

命大臣窮治之底巡撫如巡撫議奏入削公職公去滇之日百姓遮道送者數百里而巡撫憾未已又撫沈攢積案事劾公得

旨逮問下刑部獄遣戍烏魯木齊在戍所聞青上府君訃無何釋還請回籍終制服除以主事銜管通州坐糧廳授天津兵備道移通永擢直隸按察使直隸吏治飭骸骸亟圖振刷總督某貌恭而中甚之志闕不克行尋移



廣東按察使、廣東案牘填委甲天下、最稱難治、旋署布政使事、會督撫納鑒不相中、公摭拄其間、事多掣曳、而奉蜀藩之

命蜀地、號繁富、官吏貪黷、每取贏於民、以供上司、公至、聞一貲郎、需次通判、不三四年驟遷同知、知縣某恟恟、以治行稱、十六年不得調、西南徼偶有小故、輒張皇上、請發兵、糜帑金、殘民命、貪功冒賞、習爲故常、公蹙然思、重爲變更、次第梳爬、而疾遽作、遂不起、時嘉慶二十二年九月二十一日、年六十、公爲人忼爽、中無回互、而獨講求經世之術、以余所識、天下士大夫至多、而忠耿亮

直足以任國家之事無如公者公被

聖主知遇驟致大用未竟其施可爲斯世扼腕太息余嘗與公同官浙江每見必商所處其仕宦所至幕中少親戚子弟事跡不具行狀所載亦僅得公膚末而未足以窺公之大公在雲南時余方司臬廣東書問往返論事辭多感憤余先中大府蜚語

召入京幾困而公以被逮至其後公入蜀書至言尤激切余就所聞於公者直書之可以想見公之生平公好爲詩兼工衆體已刻游雁蕩詩一卷其脩兵溫處士民德之以余與公並肖像江心寺曰前秦後李公前後娶

皆康氏贈恭人無子謹度公族子也公生時先撫謹庸而立謹度爲後歿而奔公喪御匱以歸以嘉慶二十三年二月二十四日薨公於靜樂之某山某原公官二品例得立石隧道爲神道碑而余爲文之它日上之史館庶以余言爲徵辭曰

吏之蠹民之蠹掃糠粃惟汝庸衆弗容卽於凶天佑之困乃豐胡不憇殞厥躬而之厄民之窮魂歸來晉之野表神道諭來者

武顯將軍閩粵漳潮總兵官綺茗胡君墓表

君姓胡氏諱于鉉字啟名號綺茗鎮海人其先自青州遷鎮海曾祖俊杰以子雍正癸丑進士維炳贈戶部主事祖維煥封文林郎并陘縣知縣考圻乾隆辛未進士并陘縣知縣本生考堂諸生自祖考及本生考並以君貴贈如君官祖妣妣及本生妣並贈夫人胡氏世以文學起家君好文而習於武獨以武顯知名當世君本生妣某夫人出也家貧比後并陘公公故清宦家亦貧妣張夫人撫君如已出六歲就塾性穎異稍長卽能爲詩文並嫻騎射游武庠乾隆丙午中式武舉丁未揀選以

于總分發浙江試用補定海千總時李忠毅長庚方官  
定海鎮總兵見而奇之授以兵法及籌海方畧君諸所  
自効得諸忠毅爲多再遷至錢唐都司署定海游擊事  
隨忠毅出入重洋累有斬獲巡撫阮公疏薦得

旨注冊陞用阮公以君儒雅語及胡梅林讀漢書故事  
君曰此事明史藁都督傳中未載或以梅林嘗附蓉江  
故耶阮公益重君癸亥授太湖營游擊尋移黃巖丙寅  
陞江蘇川沙叅將丁卯陞廣東春江協副將戊辰廣東  
提督錢公夢虎檄赴瓊南擒盜匪五百餘名總督吳公  
奏入擢南澳鎮總兵南澳與銅山對峙閩粵咽喉重地

也時海氛方熾大洋綿亘數千里縮海而縣者所在鼎沸君身先將弁援枹鼓冒矢石親蹈不測之淵士卒服君威信無不用命遇盜卽捕先後殲斃盜匪數百級獲盜艘無算由是海上之師以南澳功稱最而其要尤在徼巡島嶼嚴捕土盜識者題之會閩督長白阿公以入閩食貨半資臺灣今禁止商船攜帶鎗礮且不許製造大船商舶畏盜販運阻滯宜如何籌畫流通詢之君君言自海盜充斥商舶販運適齋盜糧是非計出萬全流通匪易因具款條列以上阿公嘉納而三韓百公以總督兩廣至知君才一見卽與商招撫之策百公才畧過

人獨器君君有所陳多與百公協無何盜魁張保仔率  
衆降餘以次投誠而百公謝病去蒙古松公代其任君  
上言請撤長生尾礮臺改勝臺長生尾者嶺甚峻而無  
居民向設礮臺二駐兵防守無益松公然其言竟撤之  
而改勝臺嘉慶十九年八月中蜚語君方自陳辨而粵  
督三韓蔣公已劾奏褫職歸歸逾年而病又逾年而以  
病卒年五十有九君故儒者工詞翰在事十餘年書問  
文檄日不暇給纚纚數千言動合機要不假他手雖前  
明名將如俞大猷戚繼光無以過生平感激知己李忠  
毅以捕盜魁蔡牽沒於海君爲之哭之公暇輒爲詩著

有綺茗詩鈔四卷君娶孫氏贈夫人某女繼葉氏某女  
封夫人子二有濤候選通判孫出有海國學生葉出女  
一字李某孫一宋桂有濤出君卒以嘉慶二十一年十  
二月十五日以嘉慶二十四年某月某日葬於某山之  
某原



○福建布政使許齋李君墓誌銘

前福建布政使李君許齋既卒之二年其孤鹵年十七夭歿許齋服屬希濶族人謀所以後許齋者僉曰族子華清可議既定遂告許齋先人之廟及許齋之靈而成禮焉閱數月華清來無錫曰既卜地於某縣某鄉之某原葬有日矣乞余文以銘墓石嗚呼余忍不銘許齋諱唐芸字生甫嘉定人縣東北有南翔里者故昆山境後析隸嘉定李氏世居是祖諱芳太學生祖妣呂氏父諱夢璉乾隆壬戌進士江西寧都直隸州知州妣張氏姚氏兩世以君貴例得贈如君官未逮而君歿君張太夫

人出也。少讀書，博通經史，嘗受學於其鄉錢竹汀先生。竹汀言於嘉定令姚學甲，以縣試第一補博士弟子。又慕許叔重之學，因自號許齋。乾隆丙午舉於鄉，庚戌成進士。先後皆出大興朱文正之門。初任浙江孝豐縣知縣，移德清，又移平湖。九卿中有密薦君者，得

旨引見，以同知用。遷處州府同知，調嘉興府海鹽同知。陞嘉興府知府，丁繼母憂服除，補福建汀州府知府，調漳州府。尋陞汀漳龍兵備道，擢福建按察使，不數月陞布政使。蓋自君爲縣令於浙，遷至方岳，歷二十年而自汀州守累遷布政使，不過三四年，一時遭遇，罕有比倫。

而屬吏朱履中之禍作朱履中者故狡黠方君任汀漳龍時嘗爲所給調才朱委以事不辦君悟改朱敦職朱銜君會在任多虧累恐獲罪具揭督撫以虧帑由道府婪索督撫合詞密奏解君職候劾督撫無所得令福州守涂以佞鞠之屬君家人於君去任後奉敕改鑄戰船屈資常假朱白銀三百兩未及償君故不知也涂逼君自承君忿甚投繯自經時嘉慶二十二年正月十九日也事聞

上命大臣往治之事得白抵朱於法涂以佞遣戍督撫皆獲罪余以是歎知人之難如君之賢猶失之於朱而

君居官廉潔不名一錢其歿也幾無以爲殮

天子知之天下人共信之君歿閩中百姓建祠以祀固  
不待事之白而始知君之冤或謂閩中兩大府素忌君  
假手朱履中而斥之余以爲兩大府平日尙號賢者當  
不至是特以舉發於始護前奏不得不稍實其事以竟  
其獄涂以併亦向非小人一時就兩大府意旨遂成此  
禍可不畏哉可不懼哉方君之令孝豐也於乾隆甲寅  
爲鄉試同考官余爲監試始識君其移德清實予所舉  
又以大計薦君余嘗以事至平湖與君拜魯肅簡墓及  
范忠貞像陸清獻祠知君志意卓越慨然有志於古人

之爲人君以按察使入

觀過無錫乘一小舟僣從兩三人蓋君制意刻苦爲人所難能而余所期於君者方將大其施以爲國家之用。在閩治行余不盡知君之孤行述所稱與閩人之所傳說亦僅得君之末節而未足盡君之蘊余故不書而書余之所得於君者。曩在京師與朱文正論並世人才文正舉李石農及君皆文正門下士而又皆爲余所知石農性剛時方得罪上官。戊邊而君和易宜善其終惟石農在戊所文正言之得釋尋致大用。君爲縣令於浙聞薦之者卽文正。由縣令累遷藩臬兩人者不可爲不遇。

文正薨而兩人亦相繼以歿。君尤死非其所。而余先表石農神道。今又銘君墓石。亦可悲矣。君娶沈氏。江西蓮花廳同知均安女。先卒。生女一。適德清縣貢生徐琳。側趙生子一。卽鹵。君卒時年六十有五。君嘗刻竹汀遺書。其自所著書及詩古文詞多未刻。銘曰。何爲始之門。而爲經師其於世也。將大有爲於時。夫禍機翳斯民之無天子以爲良吏。未究其施而遽觸。夫禍機翳斯民之無福兮。而君又奚悲。

例贈儒林郎翰林院編修黃江陶君墓志銘

安化陶君黃江以嘉慶十年閏六月九日卒於里子編修君在京師奔喪歸將以十二年二月十一日癸未葬君於祖塋南竹山之陽先期丐余銘其墓按狀君諱必銓字士升自號黃江先世自吉州遷楚之安化遂爲安化人曾祖志鳳縣學生祖崇雅父孝信俱有隱德樂善敦古誼鄉里稱之曾祖妣彭氏祖妣彭氏妣李氏兄弟四人君其季幼穎悟受經旁及子史多所究竟旣長補博士弟子員教授里中益肆力於先儒傳注手握丹黃夜以繼日長沙城南書院者故朱朱張二子講學處也

余翰林廷燦方爲院長君從之遊旣復從羅鴻臚典於  
岳麓閉戶醺精一時推重顧試于有司俛得復矢志不  
獲讎先後學使者姚侍講頤錢通政澧皆奇其文僅餽  
於庠舉優行而已君雖不遇門弟子從之者日衆得所  
指授多蜚聲以去又能教其子發名成業而君家故實  
艱餼屢不給至室人常采藜藿以佐食不可謂不嗇于  
遭矣生平篤倫誼居親喪哀毀盡禮事其兄如父叔父  
亡於外百計營柩歸逾時猶悲不自勝其至性激發一  
一見之於詩爲人清貌頎身眉目疏朗與人交胸無畛  
域人有一事之善譽之不容口其有不若於理者則面



讓無少假尤磊落負奇氣嘗館村塾有虎患君爲文牒  
土神虎尋去其鄰屋相傳有崇居者輒病狂聞君驅虎  
事乞爲文祭之後亦無患先是歲饑道殣相望君以窮  
諸生倡義蠲輸得錢數千緡買棺掩骼一以身親之至  
如邑中建石塔葺書院鳩傘訓工雖勸靡倦其諸燉行  
甚多率類此著有易經扶微書經扶微春秋滙覽分韻  
新編黃江古文存黃江詩存黃江制藝安化縣志安化  
學志稿生平喜藏書家徒四壁插架常滿每卷印愛吾  
廬數字於其首愛吾廬者君所居書室也君生於乾隆  
二十年五月初九卒年五十有一以編修君貴例贈儒

林郎翰林院編修加一級配黃氏有賢德例贈安人先  
君十五年卒繼張氏子澍卽編修君嘉慶壬戌進士翰  
林院編修潛庠生女一皆黃安人出嫁娶並士族孫二  
孫女四自古勤學勵行之士往往槁頂黃馘不得一遇  
且不得于已者或並不得之於子得之子矣又或身先  
土壤不及見其子之遇有如君不遇於己而克見其子  
之遇顧年甫逾艾遽以病卒其可幸也夫其可感也夫

銘曰

其遇窮文則豐蹇於躬報乃崇胡不眉壽而遽終我辭  
可徵銘其宮

王惕甫墓志銘

近數十年來海內士大夫以詩古文名者不過數家而王君惕甫以諸生拔起東南雖終其身祇一爲校官晚歲杜門連蹇以歿而其名橫驚一世光氣照耀不可掩抑世之人稱之無異辭其葬也孤嘉祥等乞余爲文銘其幽烏虆是不可以不銘君長洲人諱芑孫字念豐號鐵夫又號惕甫明少傅大學士諡文恪諱鏊者君十世祖爲宏治正德間名臣世居吳縣東洞庭山後遷郡城會祖續縣學生祖世琪以文行著乾隆丁卯順天舉人歷官歙縣宣城教諭考寅熙負才任俠有名公卿間初

以君官封華亭教諭再以次子翼孫呂堰巡檢死教匪之亂賊封武德騎尉世襲雲騎尉妣繆氏贈宜人君生于歙縣學署六歲就塾具殊稟其大父親教之十二三歲卽能爲詩文大父歿從學于其鄉吳賁園智年二十一補博士弟子員時江蘇前後學使竝有人倫之鑒尤推重君而君顧不屑爲時俗科舉文字獨有志古人之學縱橫上下窮其源流而思與之竝同郡彭尺木汪大紳皆少可多否而樂與君暱君累試于有司無所得會其外父曹君銳以謁選之京師挈君同行至京相國富陽董公方官少司農邀之至邸第乾隆戊申三月

高宗純皇帝巡幸天津

召試行在

賜舉人君于是年三十有四矣會試又屢黜由 咸安  
宮教習除授華亭縣學教諭在華亭凡五年造就士類  
多知名會地方官以催科擾諸生羣譁于縣門令他出  
君爲慰譬而散之一日某以無辜移學拘繫立釋之守  
令無以難也無何丁外憂歸服除以母老不復出屬南  
城曾君賓谷都轉兩淮延君爲樂儀書院山長君常寓  
揚州之樛園賓谷好賓客日與君輩賦詩飲酒爲樂久  
之賓谷遷擢去而君先辭歸尋丁內憂先是乾隆庚戌

會試君嘗以薦卷取內閣中書榜旣發而罷之其後或  
勸君入貲爲中書君不可僅挂國子監典簿籍間有以  
書幣招者竟不問車騎過之或不報謝有屋數楹近葺  
門擁書萬卷尙思有所著述而以病輟業卒時年六十  
有三所著書有淵雅堂詩文集五十卷已刊行于世余  
始交君在乾隆丁未戊申間官京師時以文章相砥礪  
君狀貌短小而心雄氣盛懷用世之畧老而輾軻徒以  
詩古文名非君志也君內行淳備同母弟二人一早夭  
一死襄陽之亂君遣人求骸骨不得招魂葬之而撫其  
女嫁常熟吳曄遇庶弟亦有恩娶徐氏早卒繼曹氏東

城正指揮銳女三子長嘉祥次嘉福出爲叔翼孫後世襲雲騎尉江南候補守備次嘉祿縣學生孫敬修慎修卒以嘉慶二十二年十二月一日逾年十二月二日嘉祥等葬君于吳縣楞伽山之麓銘曰

文恪之後吁其哀斯人嘯起昌于辭其辭昌兮其數奇噫彼福命疇職之覃溪姬傳胥云淒後來繼者當爲誰

布衣陳景辰墓志銘

余因海寧吳槎客以識景辰槎客之過余也以嘉慶壬戌之秋偕景辰至景辰遂注弟子籍余見其詩而異之閱癸酉槎客歿而景辰無歲不過余嘗邀遊龍池善卷及南嶽張公洞今秋復以書來約句余未及赴而景辰

沒矣景辰姓陳氏宜興人今析隸荆溪諱經景辰其字父某早卒母陸氏撫景辰而教之成立詳余所爲陸孺人墓志景辰世居徐舍距縣城四十里家貧少孤露好讀書家無書則向他氏借讀其里中有張穀里衢黃梧崖中理皆詩人也景辰先後從之學詩遂工詩善化唐



陶山仲冕令荆溪聞景辰名喜與還往陶山欲拔之童子隊中而景辰不可因輟舉子業而專肆力於詩并治古文之學日事著述徐舍有菴曰梵覺景辰假僧廬授生徒自給遂以布衣終吳槎客者浙江老宿與錢竹汀王西莊兩先生同治經有業在荆溪之張渚故與景辰爲忘年交海寧又有陳鱣槎客之友而余所舉孝廉方正景辰旣識槎客并識鱣槎客屬其友爲畫兩髯圖蓋景辰與鱣皆脩髯槎客故以比之邵子湘陳其年云萊陽趙比嵐曾嘗權荆溪令屬景辰重立國山碑碑故孫吳遺跡槎客以寓公築亭其旁作國山碑考已而亭壞

槎客沒景辰復治之無何北嵐亦沒鱸繼死諸君之  
亡余皆不及銘其墓故於銘景辰墓而牽連書之景辰  
事母至孝有弟緯天娶蕭氏某女無子撫族子某爲後  
五歲而殤女四適儲泰徐萊黃應鰲一字陸茂昌景辰  
沒以嘉慶二十二年八月十八日年五十有三門人楊  
之茂汪俊黃蕓議立某後景辰並以嘉慶某年某月日  
塋之某山之阡諸子尙氣誼有古人風事皆可書景辰  
著有碧雲山房詩若干卷荆南小志若干卷物產蔬若  
干卷皆已刻古文有鈔本未刻續太平廣記一百四十  
卷陶山許爲刻之銘曰

人之生若日暮斯人亡吾誰語烏虜是爲布衣陳子之墓

、書齊少宗伯軼事

天台齊公息園以禮部侍郎告病歸乾隆壬午春二月  
高宗純皇帝南巡江浙公迎

駕至揚州將渡江

上召見公曰汝其隨朕登金山公曰臣有足疾不能行  
上曰與汝騎公曰臣不能騎江山真面目臣於舟中得  
之心爲之快若新作臺殿粉飾壯麗皆人工耳上默然  
比至西湖

上召見沈尙書德潛及公於小有天園

命和

御製詩章尙書隨和以進而公謝以病廢不能詩閱日  
又

召見曰朕聞天台之勝甲於兩浙汝天台人當能道之  
公曰穹巖絕壑虎豹所居臣生長天台敬凜孝子不登  
高不臨深之義未嘗一識石梁也

上笑曰汝真土人哉是日徧賜諸臣文綺而不及公閱  
五年族人齊周華詩案之旤作公被逮下刑部獄尋省  
釋放歸卒於家

祭萬氏妹文辭

衆萬之生適爲兄娣余長汝隨同根並蒂泪余有室汝  
亦有家吾母念汝淚痕交加歲時歸寧相見色喜遂以  
汝女配余之子數十年來骨肉夙喪吾母先逝吾父繼  
亡汝女遠行婚於京師旣從而南浙江之湄浙離吾鄉  
伊邇匪逃汝常來視以共昕夕屬奉 朝命移官沅湘  
汝女從行殞乎楚鄉汝病女死病幾不起今汝亦歿曾  
未一紀曩偕夫婿歸自章門汝子罷職家無一椽五弟  
在家爲汝賃屋僉云宅凶降灾果速居未及旬夫聳奄  
忽仲子在粵奔喪而還嗷嗷八口亦孔之躋余復遠睽

小峴山人續文集

神編

誰濟汝屯汝始病痢遂罹于凶凶問猝至慘焉疚衷生  
不見面死不憑棺余長負汝長慟何言念余仲妹先與  
世辭汝又繼之實增余哀汝有三子差勝於仲夫柩在  
殯喪車誰送死而無知汝則已矣死而有知餘痛胡底

○書梁文定公遺言

乾隆丙申春二月

高宗純皇帝東巡狩

召試獻冊之士於泰安

行在閱卷大臣凡三人會稽相國梁文定公時以少司  
農與其列而余在選中明年丁酉余以中書試官內閣  
歲時一見外公方在樞禁不常見越辛丑余於會試後  
直西苑見公於南書房公自內出甚遲曰近日有  
軍務

御製詩多未錄入副本子來甚好其爲我錄之余故提



於書頃刻錄畢公喜曰余向不知子書之捷也方今甘肅回民構亂羽書旁午軍機章京中無如子者惜子性質直不合時余退逾十日報罷而軍機傳余暫在章京上行走時軍機大臣大學士阿公及尙書和並以兵事在甘肅余入見尙書福公康安繼見公公曰子來此非余意余終慮子不合時旣而和先歸阿公亦相繼還自甘肅和果不悅余及毛君鳳儀張姚君成愆恩阿公將令余三人退出余曰吾輩當自退因入辭公公曰吾固知子不合時福公聞而固留余三人遂止癸卯秋八月公隨

駕詣

盛京余亦從一日見公於行帳公留飲酒半公曰子以  
余爲何如人余曰公正人也公忽自呼其字而詈曰梁  
階平汝尙得爲人乎汝今爲大學士與和珅同列進不  
能救其失退無以自立汝尙得爲人乎余曰公言如是  
某是以知公之爲正人也遂罷酒是年冬余丁內憂歸  
甲辰春

上巡幸江浙見公於無錫舟次公還不一年薨於位公  
愛士士多歸之戴文端循享其一也其門下流品稍雜  
人或以是疵公要之爲仁者之過云

○書嵇文恭遺事

吾鄉嵇文恭公在內閣與阿文成不協一日同坐政事堂秋暑方熾文成脫冠置案頭曰時交秋令天不雨乃酷熱不可耐公曰陰陽不和吾輩之咎也文成默然已而數以語侵公公佯作耳聾狀置弗校文成先退公語余曰余曩與阿文勒同館相善文勒若父也又一日余謁公公言少時及見徐司空蝶園司空嘗與納蘭氏忤獲譴幾不測今都御史某顧日奔走於當軸者之門何祖孫不相肖如是當軸蓋指大學士和紳顧和特待公有禮每遇公

召見出必扶掖之。乾隆壬子夏四月，公忽持奏藁過余，曰：「余耄年伴食，不安於心，將乞骸骨，用以告子。」余曰：「公當面求允而後上之。」越日見

上，果求退。

上曰：「且緩，俟朕熱河旋蹕時比。」

駕回，公具摺陳請。

上又曰：「可俟來歲春融，明年癸丑春二月，公再陳請。」

上召見軍機大臣，言嵇璜與朕同庚，擬留作老伴。朕歸政，亦令其歸。今伊必欲恣然而去，朕無如之何。如尙可暫留，令伊自商，朕弗強也。時公已趨出外朝房，軍機大

臣出命余傳

上語告公公徘徊良久余曰公自是不能復言歸矣公  
流涕曰非惟不敢且不忍遂以公言入奏而散逾兩年  
甲寅公薨於位

書安南黎侗事

安南阮光平叛其主黎維祁而自立黎維祁臣黎侗等求抹於

大清兩廣總督孫士毅率師討之而不設備兵敗於富良江士毅幾不免事

聞封阮光平爲安南王令維祁至京師隸旗下爲佐領其臣黎侗等三人從維祁至

上命薙髮易服侗等不屈

命軍機大臣鞠之侗曰侗等受命先王輔導嗣王遭家不造阮氏構難不得已求抹

天朝效申包胥七日之哭督臣奉

命致討率師輕入遽至敗衄

大皇帝以黎氏國祚旣訖理難再興

封光平而又恐光平戕害我主俾我主入

朝隸之旗下仁至義盡無以復加惟個等亡國之俘偷  
生苟活祇願速賜一死服故國之服全吾髮以見故主  
於地下耳辭甚慷慨奏入

命暫繫刑部獄越數月

上令尚書金簡出個等於獄令見黎維祚諭個等雍髮  
易服個等見黎維祚抱持大哭且曰我主不死從

天朝之命祇欲存黎民血脈耳若個等國破家亡流離  
瑣尾尚何顏薙髮易服耶

上聞仍繫之獄無何

賜個等酒肉辭不食曰個等囚也食囚食固宜酒肉非  
所敢食卒不食逾二年個等三人先後死於獄三人者  
個在安南官尚書長身修髯偉儀觀又都御史鄭某學  
士黎某俱忘其名



趙素園先生烟江送別圖書後

康熙甲子科先官諭公充順天鄉試正考官榜發稱得人定州王少司寇之樞爲舉首而滿城趙素園先生以魁儒傑士出乎其間無何中蜚語下宮諭公於刑部獄崑山翁健庵先生力援得免放歸田里在籍三十年而卒素園先生以乙丑成進士除弋陽令癸酉充江西南考官主試閣學宋公大業先生之同年也素知先生取別房遺卷屬先生閱得高安朱文端公文已爲其本房某所乙亟呈薦竟置第一某陰銜先生會擢本郡太守弋陽爲所屬益思構陷先生遂拂衣去文端由庶吉士

外用知縣累遷至巡撫入爲宰輔先是海寧陳大宗伯  
誥嘗特薦文端文端與宗伯之子文勤公同輔政稱理  
學名臣方文端之令潛山也先生偶扁舟過訪淹留五  
六月始別往游黃山文端屬友繪圖誌事卽今所傳烟  
江送別圖也文端入相後欲薦先生卒辭之先生之孫  
黻與余弟濂同舉京兆爲令浙江又與予久故而其嗣  
君刑部主事協中允熟於余出示是圖余因爲述先世  
淵源以示吾兩家子孫又憶余少時先大夫言文端撫  
浙時道無錫必過吾家益見前輩篤於恩誼以文端之  
方嚴勤勤如是此余循覽再四不禁爲之慨然三歎也